

Evening Dogri News Bulletin,

18 August 2024 18:15 Hrs

Headlines

- गृह मंत्री अमित शाह होरें आखेआ ऐ जे नागरिकता संशोधन कनून कुसै बी धर्म दे लोकें दी नागरिता दे अधिकार नेई खुस्सदा ऐ।
- केंद्री मंत्री जी. किशन रेड्डी होरें आखेआ ऐ जे जम्मू-कश्मीर दे लोक रमानदारी ते विकास चाहंदे न ते उनें वंशवाद दी राजनीति गी नकारी दित्ते दा ऐ।
- जम्मू-कश्मीर पुलसै 2023 थमां नशा तस्करें खलाफ सख्त कार्रवाई करदे होई 4 ज्हार 536 तस्करें गी गिरफ्तार कीता ऐ ते 33 ज्हार किलो शा मते नशीले पदार्थे गी तबाह कीता ऐ।
- रियासी जिले च होए दे शिड़क हादसे च 2 अध्यापकें ते इक नाबालिग कुड़ी दी मौत होई गई ऐ।

<><><><><><>

Gujrat-Amit Shah

केंद्री गृह मंत्री अमित शाह होरें आखेआ ऐ जे नागरिकता तरमीम अधिनियम सी.ए.ए कन्नै कुसै बी धर्म दे व्यक्ति दी नागरिकता खत्म नेई हुंदी सगुआं एहदे कन्नै भारतीय शरणार्थियों गी नागरिकता दे कन्नै-कन्नै मान ते न्या थ्होंदा ऐ। श्री शाह होर अज्ज अहमदाबाद च 188 विस्थापितें गी नागरिकता प्रमाण पत्र देने परेंत इक्क समारोह च बोला करदे हे। श्री शाह होरें वोट बैंक ते अपने आप गी खुश रखने आहली सियासत ताई विस्थापित होए दे हिंदुएं गी नजरंदाज करने लेई कांग्रेस दियें साबका सरकारें दी निंदेया कीती। उनें देश भरै च सी.ए.ए लागू करने गितै मोदी सरकारें दी बचनबद्धता गी दोहराया। एहदे शा पैहले गृह मंत्री होरें अज्ज अहमदाबाद च नगर निगम दी 1 ज्हार करोड़ रुपें शा बद्द दियां नेकां विकास परियोजाएं दा उद्घाटन कीता। श्री शाह होर संज्ञा लै साबरमती च पार्टी कार्यकर्ताएं गी संबोधित करडन।

<><><><><><>

BJP-Reddy

केंद्री मंत्री ते बीजेपी चुनां प्रभारी जी-किशन रेड्डी होरें आखेआ ऐ जे जम्मू-कश्मीर दे लोक विकास चाहंदे न ते उनें फुट्ट पोआने ते नफरत दी सियासत गी खारज करी दित्ता ऐ। चुनावी रणनीति पर चर्चा करने लेई अज्ज जम्मू च मौजूद मंत्री होरें आखेआ।

ओमर अब्दुल्ला हुंदे इस ब्यानै पर प्रतिक्रिया दिंदे होई जे जेकर नेशनल कांफ्रेंस सत्ता च औंदी ऐ ते ओहू दफा 370 गी बहाल करने लेई कम्म करंगन, मंत्री होरें आखेआ।

<><><><><><>

Zulfikar-Ali BJP

राजौरी-पुंछ इलाके च भारतीय जनता पार्टी गी मजबूती प्रदान करदे होई जम्मू-कश्मीर दे साबका मंत्री ते अपनी पार्टी दे लीडर चौधरी जुल्फीकार अली जम्मू च पार्टी दफ्तरै च भारती जनता पार्टी च शामिल होई गए। जुल्फीकार जेडे पीडीपी शासन दौरान मंत्री बी रेई चुके दे न, होरें आखेआ जे ओहू केंद्री मंत्री डॉक्टर जतिंद्र सिंह, केंद्री मंत्री जी. किशन रेड्डी जेडे के जम्मू-कश्मीर लेई भाजपा दे चुनां प्रभारी बी ऐन ते भाजपा प्रभारी तरूण जुग हुंदी मौजूदगी च बीजेपी च शामिल होए। जुल्फीकार होरें आखेआ जे उनें भाजपा च शामिल होने दा फैसला इस करिये लैता ऐ कीजे भाजपा दियें नीतियां ते स्कीमां रींगै च खड़ोते दे खीरले जने तगगर पुजाई गेइयां न ते जम्मू-कश्मीर च अमन-रमानदारी बहाल होई सकदी ऐ।

<><><><><><>

Tariq-JKPCC

जम्मू-कश्मीर प्रदेश कांग्रेस कमेटी JKPCC दे नमें नियुक्त अध्यक्ष तारिक अहमद कर्रा होरें आखेआ ऐ जे जम्मू-कश्मीर इलाकाई पार्टियों कन्नै चुनां पहले गठबंधन बारै फैसला मकामी लीडरें ते केंद्री नेतृत्व कन्नै सलाह-सूत्र करने मगरा लैता जाग। जनाब कर्रा होरें कल दिल्ली च औपचारिक तौरा पर JKPCC दे प्रधान दा ओहदा सांभेया ते अपने सियासी गढ़ सैंदूल शाल्टेंग, जिसी पहले बटमालू गलाया जंदा हा, सने श्रीनगर दी कुसै बी विधानसभा सीट थमां चुनां लड़ने दी मंशा प्रगट कीती। जनाब कर्रा होर पैहलकी पीडीपी-कांग्रेस गठबंधन सरकार च वित्त मंत्री हे

ओहू बीजेपी-पीडीपी गठबंधन खलाफ हे ते उनें 2016 च लोकसभा पीडीपी थमां इस्तीफा देई दित्ता हा ते 2017 च कांग्रेस इच शामिल होई गे हे।

<><><><><><>

National-Conference

नेशनल कांफ्रेंस जम्मू-कश्मीर च विधानसभा चुनाएं गितै अपने मेदवारें दे नाएं दी घोषणा, त्रै चरणें च होने आहले चुनाएं दे पैहले गेड़ दी अधिसूचना जारी होने परेंत करोग। एहू गल्ल पार्टी दे उपाध्यक्ष ओमर अब्दुल्ला होरें अज्ज आकखी। ध्यानजोग ऐ जे चुनाएं दे पहले गेड़ दी अधिसूचना 20 अगस्त गी जारी कीती जाग ते इस गेड़ लेई मतदान 18 सितंबर गी होना ऐ। ओमर होरें गलाया जे पार्टी तैयारी करा करदी ऐ ते तौलें गै मेदवारें दी घोषणा करोग।

<><><><><><>

Tribal

जनजातीय कल्याण सोसायटी जम्मू-कश्मीर दे प्रधान प्रो. एम.के वकार होरें भारतीय चुनां आयोगी गी जम्मू-कश्मीर च चुनाएं दियें तरीकें गी परतियै तय करने दी अपील कीती ऐ तां जे खानाबदोश गुज्जर-बक्करवाल उप्परले इलाकें थमां परतोने मगरा अपने वोट पाने आहले हक्कै दा इस्तेमाल करी सकन। जारी इक्क विज्ञप्ति च उनें आखेआ जे गुज्जर-बक्करवालें दी 60-70 प्रतिशत आबादी अपने-अपने जनोरें कन्नै उप्परले इलाकें च होने करियै वोट नेई पाई सकोग। उनें चुनां आयोग अगै अपील कीती जे चुनाएं दी तरीकें गी नवंबर महीने च मुंतकिल कीता जा।

<><><><><><>

ते हुन बाकी दिएं खबरें कन्नै विजय बजाज।

JKP-Drugs

जम्मू-कश्मीर पुलिस नै नशीले पदार्थें दे नजैज बपार नेटवर्क खलाफ कार्रवाई करदे होई 2023 थमां 4536 लोकें गी गिरफ्तार कीता ऐ ते अजें तगर 463 जनें पर नशीले पदार्थें दे नजैज बपार दी रोकथाम आहले पी.आई.टी एनडीपीएस अधिनियम तैहत मामले दर्ज कीते गेन। कुल रलाइयै 3190 मामले दर्ज कीते गेन ते बड़ी बढ़

मिकदार च नशीले पदार्थें गी जब्त कीता गेआ ऐ। एहदे अलावा अदालत दे हुक्मै पर अजें तगर 33,671 किलो ड्रग्स ते 1 लक्ख 951 नशीली दोआइयें गी नष्ट कीता गेआ ऐ। पुलिस नै नार्को टेस्ट दी बिनाह पर कार्रवाई करदे होई 10 करोड़ 36 लक्ख रुपें दी 43 रौहने आहले घरें गी बी जब्त कीता ऐ। पिछले डेढ बरे दौरान नार्को-आतंकवादी नेटवर्क च कथित तौरा पर शामिल 39 लोकें गी गिरफ्तार कीता गेआ ते 19 मामले दर्ज कीते गे'न। कनून नाफज करने आहिलियें एजेंसियें 9 ज्हार 448 कनाल जिमी पर अफीम ते भंग दी नजैज खेती गी बी नष्ट कीता। लोकें गी इस कवैतु थमां बचाई कडुने ताई पुलिस मैहकमे नै समाज कल्याण विभाग दे 4 नशा मुक्ति केंद्रें दे अलावा 10 होर नशा मुक्ति केंद्र ते केंद्र शासित प्रदेश च 21 सेहत ते बद्द इलाज सहूलत केंद्र ATF-एं दी स्थापना कीती ऐ।

<><><><><><>

Reasi-Accident

रियासी च अज्ज दपैहरी होए दे इक दर्दनाक शिड़क हादसे च दऊं अध्यापकें ते इक नाबालिग कुड़ी दी मौत होई गेई। हासल जानकारी मुजब जेके-20 बी-1024 नम्बरै दी आल्टो कार रियासी दे चसाना इलाके च चामेलू मोड़ कश शिड़कै परा रूलकियै हेठ इक डूहंगी खड्डै च जाई पेई। हादसे च दऊं जनें दी मौके पर मौत होई गेई ते दऊं जनें गंभीर तौरा पर जख्मीं होई गे। जख्मियें चा इक नै इलाज दरान दम त्रोड़ी दित्ता। मारे गेदें दी पंछान अध्यापक गुलाम दीन, उध्यापक मोहम्मद अमीन ते नाबालिग कुड़ी सुमेरा गुलाम दे तौरा पर कीती गेई ऐ। एह सब्बै चसाना तहसील दे रौहने आहले हे। जख्मीं होए दे इक होर नाबालिग दा इलाज चलै करदा ऐ।

<><><><><><>

President

राश्ट्रपति द्रौपदी मुर्मू होरें रक्खड़ी दे ध्यार दिआं लोकें गी ममारखां दित्तिआं न। अपने संदेश च राश्ट्रपति होरें आखेआ जे रक्खड़ी भ्राहें ते भैहनें दे मजबूत रिश्ते दा ध्यार ऐ जेहड़ा प्यार ते विश्वास दिएं तंदें गी होर पक्का करदा ऐ। उनें आखेआ जे एह ध्यार धर्म ते संस्कृति दिएं हद्दे थमां पार जाइयै देसै दी अनेकता च एकता गी दर्शादा ऐ। राश्ट्रपति होरें आखेआ जे एह ध्यार महिलाएं दे अधिकारें दी राक्खी लेई स्हाडे धेइये गी होर मजबूत करदा ऐ।

<><><><><><>

Raskha-Bandhan

रक्खड़ी दी पूर्व संझा मौके अज्ज बजारें च खूब रौनक दिक्खने गी लब्बा'रदी ऐ। बैहनां अपने-अपने भ्राएं ताई रक्खड़ियां ते मठाइयां खरीदने आस्तै बजारें च लब्बा'रदियां न। प्रधानमंत्री नरेंद्र मोदी हुंदे आस्सेया दित्ते गेदा वोकल फॉर लोक दा नारा कम्म करा करदा ऐ कीजे भारत च बनी दियें रक्खड़ियें दी मंग बद्द ऐ ते लोक चीनी रक्खड़ियें थमां परहेज करा करदे न। राजेश खजूरिया नां दे इक्क दकानदार नै आकाशवाणी संवाददाता कन्नै गल्ल करदे होई मकामी रक्खड़ियें दी मंग बारै गल्ल करदे होई दस्सेया।

<><><><><><>

Blood-Donation

संत निरंकारी मिशन दी सांबा शाख आस्सेया संत निरंकारी सत्संग भवन सांबा च इक रक्तदान केंप दा सरिस्ता कीता गेआ। आकाशवाणी दे सांबा संवाददाता सतपाल शर्मा मुजब राजपुरा घगवाल थमां बी श्रद्धालुएं इस कैंप च हिस्सा लैता। इस मौके पर खून दे 155 युनिट हासल होए। सांबा दे डिप्टी कमिशनर राजेश शर्मा होरें इस कैंप दा उद्घाटन कीता। आकाशवाणी कन्नै गल्ल करदे होई उनें आखेआ।

<><><><><><>

Ayush-Poonch

आयुष मैहकमा पुंछ जिले दी मंडी तहसील च श्री बुड्डा अमरनाथ जी दे यात्रुएं गी बमारियें कन्नै लड़ने दी ताकत बदाने आहिलियें दोआइयें गी मुफ्त तकसीम करा'रदा ऐ कीजे पदरे इलाकें थमां औने आहले शिवभक्तें गी प्हाड़ी इलाके च यात्रा दौरान मुश्कलें दा सामना करना पौंदा ऐ। श्री बुड्डा अमरनाथ जी दे दर्शनें गित्तै मंदर च औने आहले यात्रुएं एहदे पर खुशी प्रगट कीती ते आकाशवाणी संवाददाता गी दस्सेया।

<><><><><><>